

ISSN: 2181-9416



ЮРИСТ АХБОРОТНОМАСИ

ВЕСТНИК ЮРИСТА * LAWYER HERALD

ХУҚУҚИЙ, ИЖТИМОИЙ, ИЛМИЙ-АМАЛИЙ ЖУРНАЛ



CYBERLENINKA

научная электронная
библиотека
eLIBRARY.RU

ISSN 2181-9416
Doi Journal 10.26739/2181-9416

ЮРИСТ АХБОРОТНОМАСИ
3 СОН, 3 ЖИЛД

ВЕСТНИК ЮРИСТА
НОМЕР 3, ВЫПУСК 3

LAWYER HERALD
VOLUME 3, ISSUE 3



TOSHKENT-2023

Мундарижа

ДАВЛАТ ВА ҲУҚУҚ НАЗАРИЯСИ ВА ТАРИХИ. ҲУҚУҚИЙ ТАЪЛИМОТЛАР ТАРИХИ

1. ХОДЖАЕВ Бахшилло Камолович	
ҲУҚУҚ УСТУВОРЛИГИ ИНДЕКСИДА ЎЗБЕКИСТОННИНГ ЎРНИНИ ЯХШИЛАШ МАСАЛАЛАРИ	8
2. СОДИКОВ Акмал Шавкат ўғли	
НОРМА ИЖОДКОРЛИГИ ЖАРАЁНИНИ ТАКОМИЛЛАШТИРИШНИНГ ИСТИҚБОЛЛИ ЙЎНАЛИШЛАРИ	13

КОНСТИТУЦИЯВИЙ ҲУҚУҚ. МАЪМУРИЙ ҲУҚУҚ. МОЛИЯ ВА БОЖХОНА ҲУҚУҚИ

3. УМИДУЛЛАЕВ Қаҳрамон Усманович	
ИЖРО ЭТУВЧИ ҲОКИМИЯТ ОРГАНЛАРИ ФАОЛИЯТИНИ БАҲОЛАШ БОРАСИДАГИ КАМЧИЛИКЛАР ТАҲЛИЛИ	20

ФУҚАРОЛИК ҲУҚУҚИ. ТАДБИРКОРЛИК ҲУҚУҚИ. ОИЛА ҲУҚУҚИ. ХАЛҚАРО ҲУСУСИЙ ҲУҚУҚ,

4. ОКЮЛОВ Омонбой, Юлдашев Жаҳонгир Иномович	
ЎЗБЕКИСТОН РЕСПУБЛИКАСИДА ҲУСУСИЙ МУЛК ҲУҚУҚИНИ ҲИМОЯ ҚИЛИШ БОРАСИДА АМАЛГА ОШИРИЛГАН САМАРАЛИ ИСЛОҲОТЛАР (ҚОНУНЧИЛИК ТАҲЛИЛИ ВА МАВЖУД МУАММОЛАР)	27
5. ТИЛЛАБОЕВ Шоҳрухбек Мирзатиллаевич,	
ОСОБЕННОСТИ НАРУШЕНИЙ АВТОРСКИХ ПРАВ НА ОНЛАЙН ПЛАТФОРМАХ.....	39
6. ERKINOV Bekzod	
THE PROCEDURE FOR REGULATING A FRANCHISE AGREEMENT (COMPLEX BUSINESS LICENSE) IN THE USA AND OTHER COUNTRIES	44

ЖИНОЯТ ПРОЦЕССИ. КРИМИНАЛИСТИКА, ТЕЗКОР-ҚИДИРУВ ҲУҚУҚ ВА СУД ЭКСПЕРТИЗАСИ

7. УМАРХОНОВ Азизхон Шарипхонович	
РИВОЖЛАНГАН ХОРИЖ ДАВЛАТЛАРИ ЖИНОЯТ ПРОЦЕССИ ИШТИРОКЧИЛАРИНИНГ ХАВФСИЗЛИГИНИ ТАЪМИНЛАШ БЎЙИЧА ТАЖРИБАСИ	49
8. БАРАКАЕВ Лазизжон Отакулович	
ТАФТИШ ТАЙИНЛАШ ВА ЎТКАЗИШНИНГ ПРОЦЕССУАЛ ТАРТИБИ ВА УНИ ТАКОМИЛЛАШТИРИШ МАСАЛАЛАРИ	56
9. ИМОМНАЗАРОВ Алишер Ҳасанович	
КЎЗДАН КЕЧИРИШ ТЕРГОВ ҲАРАКАТИНИ ЎТКАЗИШНИНГ ПРОЦЕССУАЛ ЖИҲАТЛАРИ	63

ХАЛҚАРО ҲУҚУҚ ВА ИНСОН ҲУҚУҚЛАРИ

10. РАСУЛОВ Журабек Абдусамиевич	
ХАЛҚАРО ҲУҚУҚ ДОКТРИНАСИДА ЭРКИН ҲАРАКАТЛАНИШ ҲУҚУҚИ ВА ДАВЛАТ СУВЕРЕНИТЕТИ МАСАЛАЛАРИ.....	78

11. РАХМАНОВ Шухрат Наимович	
СРАВНИТЕЛЬНО-ПРАВОВОЙ АНАЛИЗ ДОГОВОРНЫХ ИСТОЧНИКОВ ПО ОБЕСПЕЧЕНИЮ БЕЗОПАСНОСТИ ПЕРСОНАЛА МЕЖДУНАРОДНЫХ ОРГАНИЗАЦИЙ.....	88
12. ЮНУСОВ Ҳайдарали	
МУРОЖААТ ҚИЛИШ ҲУҚУҚИНинг КОНСТИТУЦИЯВИЙ ВА ХАЛҚАРО-ҲУҚУҚИЙ АСОСЛАРИ	95
13. МАХАМАТОВ Махмуд	
ХОДИМЛАР ВА ИШ БЕРУВЧИЛАР ВАКИЛЛИГИНИ ХАЛҚАРО ВА МИЛЛИЙ ДАРАЖАДА ТАРТИБГА СОЛИНИШИ.....	102
14. САЙДОВ Олим Чорикулович	
ЖАЗО ҮТАШНИ ДАВОМ ЭТТИРИШ УЧУН ФУҚАРОСИ БЎЛГАН ДАВЛАТГА МАҲҚУМЛАРНИ ТОПШИРИШНИ РАД ЭТИШНИНГ ТАШКИЛИЙ-ҲУҚУҚИЙ ЖИҲАТЛАРИ	109
15. МИРУКТАМОВА Феруза Лутфуллаевна	
АҲБОРОТ АСРИДА БОЛА ҲУҚУҚЛАРИ ВА ХАВФСИЗЛИГИНИ ТАЪМИНЛАШНИНГ ҲУҚУҚИЙ МАСАЛАЛАРИ.....	115
16. VALIJONOV Daler Dilshodovich	
KORRUPSIYAGA QARSHI KURASHISHDA XALQARO HAMKORLIKNING AYRIM MASALALARI.....	122
17. РАСБЕРГЕНОВА Сарбиназ Алишеровна	
РЕАЛИЗАЦИЯ НОРМ МЕЖДУНАРОДНОГО ЭКОЛОГИЧЕСКОГО ПРАВА В НАЦИОНАЛЬНОЙ ПРАВОВОЙ СИСТЕМЕ	129
18. СУЛАЙМАНОВ Одилжон Раббимович	
ЎЗБЕКИСТОНДА ИНСОННИНГ ҲУҚУҚ ВА ЭРКИНЛИКЛАРИНИ ТАЪМИНЛАШ ДАВЛАТНИНГ ОЛИЙ МАҚСАДИДИР	137
19. РАХМАНОВ Абдумухтор Режжаббаевич	
ПРАВА ЧЕЛОВЕКА И СТАТУС ЛИЧНОСТИ В ИСЛАМСКОМ ПРАВЕ	145

ЮРИСТ АХБОРОТНОМАСИ ВЕСТНИК ЮРИСТА LAWYER HERALD

ХАЛҚАРО ҲУҚУҚ ВА ИНСОН ҲУҚУҚЛАРИ

РАСУЛОВ Журабек Абдусамиевич

Тошкент давлат юридик университети "Халқаро ҳуқуқ ва инсон ҳуқуқлари" кафедраси доценти в.б., юридик фанлари бўйича фалсафа доктори (PhD),
E-mail: rasulovjurabek1982@gmail.com

ХАЛҚАРО ҲУҚУҚ ДОКТРИНАСИДА ЭРКИН ҲАРАКАТЛАНИШ ҲУҚУҚИ ВА ДАВЛАТ СУВЕРЕНИТЕТИ МАСАЛАЛАРИ

For citation (иқтибос келтириш учун, для цитирования): РАСУЛОВ Ж.А. Халқаро ҳуқуқ доктринасида эркин ҳаракатланиш ҳуқуқи ва давлат суверенитети масалалари // Юрист ахборотномаси – Вестник юриста – Lawyer herald. № 3 (2023) Б. 78-87.



3 (2023) DOI <http://dx.doi.org/10.26739/2181-9416-2023-3-10>

АННОТАЦИЯ

Мазкур мақолада халқаро ҳуқуқ доктринасида шахсларнинг эркин ҳаракатланиш ҳуқуқи ва давлат суверенитети масалалари оид мумтоз халқаро ҳуқуқшунос олимларнинг илмий қарашлари асосида таҳлил қилинган. XV-XVIII асрларда одамларнинг чегараларни кесиб ўтиши халқлар ҳуқуқи тўғрисидаги дастлабки мунозараларнинг марказида бўлди. Бу даврларда халқаро ҳуқуқнинг ушбу ўзига хос масаласи мумтоз халқаро ҳуқуқшунос олимлар томонидан учта асосий мактаб бўйича ўрганилган. Мақолада мазкур мактабларга хос бўлган жиҳатлар Витория, Гроций, Пуфендорф, Вольф ва Ваттел каби олимларнинг илмий қарашлари асосида таҳлил қилинган.

Калит сўзлар: эркин ҳаракатланиш, давлат суверенитети, мулоқот ҳуқуқи, зарурият ҳуқуқи.

РАСУЛОВ Журабек Абдусамиевич

И.о.доцента кафедры Международного права и прав человека,
Ташкентского государственного юридического университета,
доктор философии по юридическим наукам (PhD)
E-mail: rasulovjurabek1982@gmail.com

ВОПРОСЫ ПРАВА НА СВОБОДНОЕ ПЕРЕМЕЩЕНИЕ И ГОСУДАРСТВЕННОГО СУВЕРЕНИТЕТА В ДОКТРИНЕ МЕЖДУНАРОДНОГО ПРАВА

АННОТАЦИЯ

В данной статье анализируются вопросы права на свободное перемещение лиц и государственного суверенитета в доктрине международного права на основе научных взглядов классиков международников-правоведов. В XV-XVIII веках перемещение людей через границы было в центре ранних дебатов о правах наций. В

эти периоды эта специфическая проблема международного права изучалась учеными-международниками по трем основным школам. В статье анализируются аспекты, характерные для этих школ, на основе научных взглядов таких ученых, как Витория, Гроций, Пуфendorf, Вольф и Ваттель.

Ключевые слова: свобода перемещение, государственный суверенитет, право на общение, право необходимости.

RASULOV Jurabek

Acting Assistant Professor of the Department of International Law and Human Rights, Tashkent State University of Law,

Doctor of Philosophy (PhD) in Law

E-mail: rasulovjurabek1982@gmail.com

RIGHT TO FREE MOVEMENT AND STATE SOVEREIGNTY IN THE DOCTRINE OF INTERNATIONAL LAW

ANNOTATION

This article analyzes the issues of the right to free movement of persons and state sovereignty in the doctrine of international law based on the scientific views of the classics of international law. In the 15th and 18th centuries, the movement of people across borders was at the center of early debates about the rights of nations. During these periods, international scholars in three main schools studied this specific problem of international law. The article analyzes the characteristic features of these schools, based on the views of such scientists as Vitoria, Grotius, Pufendorf, Wolf and Vattel.

Keywords: freedom of movement, state sovereignty, the right to communicate, the right of necessity.

Халқаро ҳуқуқ одамларнинг эркин ҳаракатланиши ҳуқуқи ва давлатларнинг ҳудудий суверенитети борасидаги қарашлар ўртасида кечган мунтазам мунозаралар натижасида миграция билан боғлиқ асосий концепция (тушунча)ларни шакллантириди. Бундай узоқ давом этажган мунозаралар халқаро ҳуқуқ тарихида кескин ўзгаришларга учради.

Эркин ҳаракатланиш узоқ вақт давомида халқаро ҳуқуқ доктринаси ва амалиётида мавжуд қоида бўлиб келган, ҳудудий суверенитет эса даставвал давлатларнинг муайян муҳим манфаатларини ҳимоя қилиш учун ушбу қоидадан истисно сифатида тушунилган. Халқаро миграция ҳуқуқининг ушбу иккита асосий тушунчалари орасидаги иерархик тартибот аста-секинлик билан ўзгариб боради, бунинг натижасида давлат суверенитети ушбу соҳада асосий қоидага айланади.

Хронологик нуқтаи назардан бу жараённи халқаро ҳуқуқ тарихида **учта асосий босқич** орқали ифодалаш мумкин. Ҳар бир босқич ўз даврининг руҳига хос бўлган хусусиятларни намоён қиласди. Ушбу уч босқичли даврлаштиришдан сўнг, одамларнинг чегараларни кесиб ўтиши *дастлаб XVI асрдан XVIII асрغا* бўлган даврда халқаро ҳуқуқининг асосчилари орасида одатий муҳокама мавзусига айланди.

Иккинчидан, кейинги ҳуқуқшунослик амалиёти ва илм-фани XIX – XX асрларда эркин ҳаракатланишнинг юксалиш ва пасайишларига гувоҳ бўлди, чунки ўша пайтларда ҳукмрон бўлган *laissez faire-laissez passer* (фр. *майли бажаришин ва майли ўтишсин*) қоидаси аста-секинлик билан чекловчи ички иммиграция қонунчилиги билан алмашди. Давлатлар томонидан миграция назоратининг тарқалиши эса, мос равишда, инсоният тарихида XX асрнинг бошларида содир бўлди.

Учинчидан, ва ниҳоят, давлат амалиётининг ушбу янги модели XX аср давомида ва XXI аср бошларида инсон ҳуқуқларига оид нормалар кенгайишининг ёндош таъсири сифатида қабул қилувчи давлатларда мигрантлар ҳуқуқларининг ортиб бораётгани тан

олиниши билан ҳамоҳанг равищда пайдо бўлди. Ушбу эволюция натижасида иммиграция назоратининг ҳамма жойда мавжудлиги инсон ҳуқуқлари билан бирга амалда бўлиб келмоқда. Миграция устидан назорат ва мигрантлар ҳуқуқлари ўртасидаги бундай мувозанат замонавий халқаро миграция ҳуқуқининг мураккабликлари ва қарама-қаршиликларини очиб берувчи ўзига хос фарқловчи хусусиятига айланди.

XVI—XVIII асрларда Халқлар ҳуқуқи тўғрисидаги илк таълимот халқаро оммавий ҳуқуқнинг тузилиши, унинг асослари ва асосий тушунчаларини концептуаллаштиришда ҳал қилувчи роль ўйнади. Ушбу дастлабки даврда одамларнинг чегараларни кесиб ўтиши халқлар ҳуқуқи тўғрисидаги дастлабки мунозараларнинг марказида бўлди. Умуман олганда, халқаро ҳуқуқнинг ушбу ўзига хос масаласи дастлабки олимлар томонидан учта асосий мактаб бўйича тушунилган [1, Б.901].

Одамларнинг эркин ҳаракатланиши биринчи марта Витория ва Гроций томонидан халқлар ўртасидаги мулоқот ҳуқуқи орқали халқаро ҳуқуқ нормаси сифатида тан олинган. Ушбу нуқтаи назарга кўра, давлатнинг суверенитети унинг меҳмондўстлигига мувофиқ келади, деб ҳисобланилган. Аксинча, кейинги олимлар (масалан, Пуфендорф ва Вольф) давлат ўз хоҳишига кўра ўзининг худудий суверенитетидан келиб чиқсан ҳолда чет элликларни қабул қилишдан бош тортиши мумкинлигини таъкидлашади. Шунга кўра, меҳмондўстлик давлатнинг хоҳиш-истагига кўра кўрсатадиган хайр-эҳсонига айланди. Бироқ, ушбу бир-бирига зид бўлган турли қутблар – меҳмондўстлик ва суверенитет ўртасида кейинчалик Э. де Ваттель олтин ўрталиқни таклиф қиласди, унга кўра давлатнинг чет элликларни мамлакатга киришига рухсат бериш тўғрисида қарор қабул қилиш борасидаги суверен ҳокимияти зарурат ҳуқуқига асосланган киришнинг чекланган эркинлиги билан мувозанатга келиши лозим.

Одамларнинг чегаралар орқали эркин ҳаракатланиши халқаро ҳуқуқ тарихида узоқ ўтмишига эга. Биринчи марта Гроций уни меҳмондўстлик ҳуқуқидан келиб чиқсан халқаро ҳуқуқнинг асосий принципи сифатида тасдиқлашидан олдин, Витория томонидан мулоқот қилиш ҳуқуқи (*ius communicationis*) орқали тан олинган ва тушунилган.

Одамларнинг ҳаракатланиш эркинлигини халқаро ҳуқуқнинг асосий принципи сифатида белгилашда муҳим ролни кўпинча “замонавий халқлар ҳуқуқининг асосчиси” деб аталадиган **Франсиско де Витория** (1480-1546 й.) ўйнади. Унинг *ius communicationis* тушунчаси 1539 йилда Испаниядаги Саламанка университетида ўқиган машхур “Америка ҳиндулари ҳақида”ги маърузасида у ўз даврининг энг мунозарали масаласи: Испаниянинг Янги Дунёни босиб олишининг қонунийлигини муҳокама қилганида ривожлантирилган.

Витория дастлаб ҳиндулар ўз ерларининг ҳақиқий хўжайини ва шу тариқа эгалик ҳуқуқига (доминиумга) эга эканлигини таъкидлайди. Шунинг учун испанлар “улардан на хусусий шахслар, на ҳукмдорлар сифатида мулкларини тортиб ололмайдилар” [2, Б.250], дея эътироф этади. Кейинчалик Витория одатда Янги Дунёни мустамлака қилишни оқлаш учун кенг фойдаланиладиган турли асосларни, масалан, император ва папанинг универсал ҳокимияти, кашф этиш ҳуқуқи ёки христиан динидан воз кечиш кабиларни синчковлик билан рад этади. Шунга кўра, у испанлар истилосини оқлаши мумкин бўлган қонуний асосларни тадқиқ қилишдан аввал “испанлар илк бор варварлар ерларига сузуб кирганларида, уларнинг мамлакатларини босиб олишга ҳеч қандай ҳуқуқлари йўқ эди”, [2, Б.264] деган холосага келади.

Саламанка университети профессори томонидан испанлар истилосини оқлаш сифатида “биринчи адолатли титул” деб номланган ёрлиқ “табиий ҳамкорлик ва алоқа ҳуқуқи” (*naturalis societas et Communicationis*)га асосланади. Шахсларнинг эркин ҳаракатланиши халқаро ҳуқуқнинг асосий аксиомаси ҳисобланади. Витория эркин ҳаракатланиш принципини ҳар бир давлат учун (хоҳ европа, хоҳ бошқа минтақага оид бўлсин) мажбурий бўлган, одамларнинг табиий мулоқотига асосланган ва азалий меҳмондўстликанъанаси сифатида эътироф этилган чинакам универсал норма сифатида урғулади.

Ушбу принципга мувофиқ, “агар испанлар варварларга зарар етказмасалар, ушбу мамлакатларга саёчат қилиш ва у ерда яшаш ҳуқуқига эгадир”. Бундай ҳаракатланиш ҳуқуқи халқаро ҳуқуққа асосланади: у “ёки табий ҳуқуқ ҳисобланадиган, ёки ундан келиб чиқадиган халқлар ҳуқуқи (*ius gentium*)дан ўзак олади”.

Виторияга кўра, барча халқлар саёчат қилиш ҳуқуқини халқаро ҳуқуқ қоидаси сифатида тан олдилар, чунки “барча халқлар орасида бегоналарга нисбатан меҳмондўстларча муносабатда бўлиш инсонийлик қоидаси бўлиб, шунга монанд мажбуриятни ҳам юклайди, деб ҳисобланган” [2, Б.278]. Шунингдек, олим бу қоида дунё пайдо бўлганидан бери мавжуд эканлигини ва у дунёнинг турли халқларга бўлиниши натижасида шубҳа остига олинмаганлигини таъкидлайди.

Шундай қилиб, Витория учун эркин ҳаракатланиш одамларнинг табий мулоқотига асосланган халқаро ҳуқуқ принципи сифатида меҳмондўстлик бурчидан келиб чиқади.

Виториянинг *ius communitatis* қоидаси бошқа давлатнинг ҳудудига кириш ҳуқуқига тенглаштирилади: агар қабул қилувчи жамиятга зарар етказмаса, чет элликларни бошқа давлат ҳудудига қабул қилиш мажбурий ҳисобланади. Унинг фикрига кўра, бундай кириш фақат бир ҳолатдагини, яъни агар у “варварларга зиён ва зарар етказмаса” “қонуний” ҳисобланади. Гарчи Витория мазкур истиснонинг аниқ мазмунини тушунтиргмаган бўлса-да, ҳеч қандай жиноят содир қилмаган хорижликлар бошқа давлатга эркин кириши мумкинлигини аниқ баён қилди: “бирор бир жиноятни содир қилишда айбор бўлмаган ташриф буюрувчиларни мамлакатдан чиқариб юбориш ноқонунийдир” [2, Б.278].

Виториянинг халқлар ҳуқуқи концепциясининг замирида халқлар ўртасида мулоқот қилиш ҳуқуқи ётади: бундай ҳуқуқ нафақат халқаро ҳуқуққа асосланади, балки унинг асл моҳиятинида ташкил қиласиди. Ушбу ёндашувга таянган ҳолда, мулоқот қилиш ҳуқуқи тенг ҳуқуқли халқлар ўртасида халқаро муносабатларни ўрнатишнинг зарурий шарти ҳисобланади ва, шундай қилиб, бутун халқаро ҳуқуқ мавжудлигининг моҳиятини ифодалайди.

Виториянинг *ius communitatis* принципи **Гуго Гроций** (1583-1645 йй.) томонидан кўллаб-қувватланган ва ривожлантирилган. Гроций нафақат Виториянинг нуқтаи назарини кўллаб-қувватлади, балки эркин ҳаракатланиш принципининг мазмунини ҳам аниқлаштириди, ҳам бойитди. Гроций ушбу принципнинг энг муҳим таркиби қисмлари – ўз мамлакатини тарк этиш ҳуқуқи ва бегона давлатда қолиш ҳуқуқини бир танганинг икки томони сифатида кўрсатди. Бинобарин, Витория халқаро ҳуқуққа мувофиқ одамларнинг эркин ҳаракатланиши учун асосларни белгилаб берган бўлса, Гроций эса унинг мазмунини мустаҳкамлаб, батафсил баён қилди.

Голланд ҳуқуқшуноси “халқаро ҳуқуқнинг тимсоли” ҳисобланган “Очиқ денгиз” номли (1609 йил) асарида биринчи маротаба *ius communitatis* умумий тушунчасини муҳокама қилган. Ҳуқуқшунос мулоқот эркинлигини халқаро ҳуқуққа хос бўлган фундаментал принцип сифатида қўйидаги тарзда тасдиқлади: “ҳар бир халқ бошқа халқ билан эркин саёчат қилиши мумкин ва бу халқаро ҳуқуқнинг бузилмас қоидаси бўлиб, бу ўз-ўзидан равшан ва ўзгармас ҳисобланади” [3, Б.252].

Кейинчалик Гроций бундай қоида барча учун умумий бўлган мулклар (масалан, денгиз) билан чегараланиб қолмай, балки давлатларга тегишли ҳудудларга нисбатан ҳам тааллуқли эканлигини таъкидлайди: “ҳатто хусусий мулк қилиб берилган ерга ҳам, хоҳ у бир миллатга, хоҳ давлатга тегишли бўлишидан қатъи назар қўплаб халқларнинг вакиллари бўлган кишиларга ўтиши ҳуқуқидан (яъни, қуролсиз ва тинч мақсадда ўтиши) фойдаланишини тақиқлаш ва ушбу ҳуқуқни инкор этиши адолатсизлиkdir” [3, Б.253].

Тинч мақсадда ўтиш ҳуқуқи Гроцийнинг машхур “Уруш ва тинчлик ҳуқуқи” (1625 йил) асарида янада ривожлантирилган. Ушбу асар “халқаро ҳуқуқ биринчи марта тизимли равища кўриб чиқилган” манба сифатида юқори баҳоланганди. “Барча одамлар учун умумий бўлган нарса”ни муҳокама қиласар экан, Гроций яна бир бор қайд этадики, “ҳар қандай қуруқлик ва дарёлар ёки ҳар қандай халққа тегишли бўлган денгизнинг бирор бир қисмидан адолатли шароитлар тақозо этганда одамларга эркин ўтиш ҳуқуқи берилиши шарт”. Виториянинг қарашларини қўллаб-қувватлаган ҳолда, Гроций эркин

үтиш ҳуқуқи рад этилган тақдирда уни куч билан талаб қилиш мумкин, деган холосага келади [4, Б.110].

Гроций масалага янада чукурроқ ёндашиб, иккита энг муҳим тушунчани - ўз мамлакатини тарк этиши ҳуқуқи ва хорижий давлатда қолиш ҳуқуқини аниқ ва бир оз замонавий атамалар билан ифодалади. Биринчи тушунча борасида, Гроций “бир киши ўз мамлакатини тарк этгандаги ҳолат”га алоҳида эътибор берган [4, Б.110].

Цицероннинг мамлакатдан чиқиши эркинлигини “эркинликнинг асоси” сифатида кўрадиган қарашини қўллаб-қувватлаган ҳолда, Гроций ўз мамлакатини тарк этиши ҳуқуқи мутлақ эмаслигини тан олди, чунки мазкур ҳуқуқ ҳам қарздорлар учун, ҳам уруш даврида жамоат манфаатлари учун чеклашларга учраши мумкин. Бундай истисноли ҳолатлардан ташқари, “халқлар ҳар кимга давлатдан чиқиб кетиш эркинлигини қолдиради” принципи сақланиб қолди.

Ўз мамлакатини тарк этиши ҳуқуқи хорижий давлатда қолиш ҳуқуқи билан тўлдирилади ва мустаҳкамланади. Бу эркин ҳаракатланиш натижасида бегона мамлакатда қолиш масаласини ўрганмаган Витория билан солиширигандан Гроцийнинг яна бир муҳим қўшимча афзаллигини намоён қиласди.

Ўз мамлакатини тарк этиши ҳуқуқи каби хорижий давлатда қолиш ҳуқуқи ҳам мутлақ эмас: ушбу ҳуқуқ хорижий мамлакатда қолиш учун “адолатли сабаб”нинг мавжудлигини ва чет элликларнинг мезбон давлат қонунларига риоя қилишларини назарда тутади.

Ҳимояга лойиқ бўлган шахслар ва унга муносиб бўлмаган шахслар ўртасида чегарани белгилаш орқали жабрдийдалар ва жиноятчилар ўртасидаги тафовутли жиҳатлар қочоқ тушунчасининг замонавий таърифини аниқ белгилашда намоён бўлди. Бироқ, Гроцийнинг ҳиссаси бошпана тақдим этиши масаласи билан чекланмайди.

Гроций Витория томонидан бошланган мунозараларни сезиларли даражада бойитди. У нафақат халқлар ўртасида мулоқот қилиш ҳуқуқини халқаро ҳуқуқнинг барча давлатлар учун мажбурий бўлган универсал нормаси сифатида тасдиқлади, балки бу принципни янада мустаҳкамлади ва такомиллаштириди, яъни ўзаро боғлиқ бўлган икки ҳуқуқни: *тарк этиши (ўз мамлакатини) ва кириш (бошқа давлатга)* ҳуқуқини эркин ҳаракатланишининг асосий принциплари сифатида белгилаб берди.

Витория ва Гроцийдан фарқли ўлароқ, халқлар ҳуқуқи доктринасининг кейинги тадқиқотчилари давлатлар ўз хоҳишлирига кўра чет элликларни қабул қилишни рад этиши ҳуқуқига эга эканлигини таъкидладилар. Илмий тафаккурдаги ушбу ўзгариш, афтидан, 1648 йилда Вестфалия тинчлик шартномаси билан тасдиқланган давлат суверенитетининг мустаҳкамланиши билан бир вақтга тўғри келди. Халқлар ҳуқуқи доктринаси доирасида суверен ҳокимиятнинг чет элликларни қабул қилишни рад этишининг асоси иккита бир-бирини тўлдирувчи қўйидаги тушунчаларга асосланган эди: Пуфендорф томонидан таклиф қилинган давлатнинг сабаби ва Вольф томонидан ишлаб чиқилган давлатнинг патrimonial концепцияси.

Самуэль Пуфендорф (1632-1694 йй.) Виториядан мерос қолган ва Гроций томонидан ишлаб чиқилган халқлар ўртасидаги мулоқот ҳуқуқидан воз кечган дастлабки олимлардан бири ҳисобланади. Немис профессори хорижикларни қабул қилишни рад этишини турли хил нормалар тўплами билан тартибга солинадиган иккита қарама-қарши тушунча сифатида ажратди. Эмиграция масаласида Пуфендорф 1672 йилда нашр этилган “Табиат ва халқлар қонуни” асарида “ҳар бир инсон ўз хоҳишига кўра ҳаракатланиш эркинлигини сақлаб қолади”, деб тасдиқлайди [5, Б.26-60].

Пуфендорф учун ўз мамлакатини тарк этиши ҳуқуқи умумий эркин ҳаракатланиш принципидан алоҳида бўлиб, ундан ажралиб туради. Ўз мамлакатини тарк этиши ўзига хос ҳуқуқقا айланади, ўз ўрнида бошқа мамлакатга кириш эса давлатнинг суверен ваколатига тааллуқли ҳисобланади.

Натижада давлатнинг чет элликларни мамлакатга киришига рухсат бериш тўғрисида қарор қабул қилиш ҳуқуқи, ўз мамлакатини тарк этиши эркинлиги бошқа давлатга кириш ҳуқуқи билан мос келмади. Биринчиси алоҳида шахсларга тааллуқли ҳуқуқ бўлса, иккинчиси эса давлатга тегишли ҳуқуқ әди. Вақт ўтиши билан ушбу фарқ умумқабул

қилинганд бўлса-да, Пуфендорф ўзидан олдинги олимларнинг фикрларидан узоқ бўлган бу қарашларининг аниқ мантиқий сабабларини тушунтирмади.

Пуфендорф ҳаракатланиш эркинлигини халқаро ҳуқуқ қоидаси сифатида рад этиб, мунозара шартларини ўзгартириди: суверенитет принципга айланган бўлса, меҳмондўстлик эса истисно ҳолатга. Шундай қилиб, гарчи ушбу икки тушунчани бир-бирига таққослаш шарт бўлмасада, у биринчисини (суверенитет) иккинчисидан (меҳмондўстлик) афзал кўрди. Пуфендорфга кўра, чет элликларга рухсат бериш нафақат инсонпарварлик масаласи сифатида, балки утилитаризмнинг илк концепциясига мувофиқ давлат манфаатларида ҳам қўллаб-қувватланиши лозим эди:

Инсонийлик, ҳақиқатдан, бизни ўз ватанларидан ўзларининг камчиликлари ва содир этган жиноятлари учун эмас, балки бошқа турли сабаблар билан қувилган кам сонли одамларни қабул қилишга мажбур қиласди, аниқса улар ўзларининг бойликлари ва меҳнаткашилиги билан ажралиб туришса ҳамда бизнинг динимиз ва конституциямизга таҳдид солишмаса. Шундай қилиб, биз қўллаб давлатлар, энг аввало, чет элликларга мамлакатларига келиб, улар орасига жойлашишга рухсат бериш орқали буюклик ва фаровонлик чўққиларига қўтарилганини кўрамиз; ўз навбатида бошқалар эса ушбу ривожланиши усулидан воз кечиб, тараққиётнинг паст даражаларига тушишган [5, Б.26–60].

Аммо, Пуфендорфнинг бу масала борасидаги нуқтаи назари билан, хорижликларга мамлакатга кириш учун рухсат бериш қабул қилувчи давлат томонидан уларга берилган эҳсонга айланди, чунки уларни қабул қилиш учун рухсат беришда асосий эътибор давлатнинг ўз манфаатлари билан белгиланади.

Халқлар ўртасидаги мuloқot ҳуқуқидан давлатнинг дискрециявий ваколатлари (дискрециявий ваколатлар (фр. *discrétionnaire* – шахснинг хоҳиши-ихтиёрига қараб) – қонун билан давлат органлари ёки мансабдор шахсларига ўзларининг ваколатлари доирасида қарорлар қабул қилиш вариантларини танлаган ҳолда ўз ихтиёрига кўра ҳаракат қила олиши)га ўтиш **Кристиан Вольф** (1679–1754) томонидан қўллаб-қувватланган ва янада мустаҳкамланган. Немис файласуфи давлатнинг хорижликларни қабул қилиш борасидаги ўрнини ҳимоя қилишда Пуфендорфдан ҳам кўра мутаассиброқ эди. У, айниқса, давлат чет элликларнинг ўз ҳудудига киришини тақиқлаши мумкинлигини қатъият билан тасдиқлади. У ўзининг “*Jus gentium Methodo Scientifica Pertractatum*” (1749 йил) асарида “на бир халқ, на чет эллик бўлган бирор бир шахс бошқа бироннинг ҳудудида ўзига нисбатан ҳеч қандай ҳуқуқни талаб қила олмайди” деб тушунтирган. Натижада, “ҳеч бир чет эллик шахсга ҳукмдорнинг тақиқига зид равишда иккинчисининг ҳудудига киришига, ҳатто бирор бир аниқ мақсадда бўлса-да, ҳеч қандай йўл билан рухсат этилмайди” [4, Б.116].

Бундай ҳолатда давлат ҳатто “ ўз ҳудудига кирувчи шахсга жарима солиши ёки маълум бир жарима белгилаган ҳолда киришни тақиқлаши” ҳам мумкин эди. Шундай қилиб, Вольф Пуфендорф томонидан илгари сурилган ғояни мустаҳкамлади ҳамда бу билан Витория ва Гроцийнинг қарашларидан узоқлашишга сабаб бўлди: чет элликларни қабул қилиш давлатнинг дискрециявий ваколатига айланди, бу қоидани бузиш эса жиноий жазо чораларини қўллаш билан таъминланиши белгиланди.

Бундай дискрециявий ваколат давлатнинг патримониал концепциясига асосланади, унга кўра давлатнинг ўз ҳудудига эгалик қилиши суверенитетга тенглаштирилади. Вольф ушбу ўхшашликни янада батафсил ривожлантириди. Унинг фикрича, “миллатнинг ҳудудга эгалик қилиши билан суверенитет ўртасида табиий боғлиқлик борки, агар эгалик ўрнатилса, суверенитет ҳам ўрнатилади, агар суверенитет тортиб олинса, эгалик ҳам тортиб олинади”. Шундай қилиб, “давлат ҳукмдорини ҳудуднинг хўжайини (ёки эгаси) деб аташ мумкин, чунки, албатта, у миллатнинг эгасидир” [4, Б.116].

Мулк ҳуқуқи ва ҳудудий суверенитет ўртасидаги бу ассимиляция ўз-ўзидан чет элликларни давлат ҳудудидан чиқариб юборишнинг дискрециявий ҳуқуқига олиб келади: “Миллат хусусий шахс каби мулкка эга бўлиш ҳуқуқига эга. Демак, хусусий мулк эгаси сифатида бошқа ҳар қандай шахсни ўз мулкига киришини тақиқлаши мумкин,

худди шунингдек ҳудуд ҳукмдори ҳам чет элликларнинг унга киришини ман қилиши мумкин".

Ҳудудий суверенитетнинг ушбу концепциясига мувофиқ, ҳар бир давлат чет элликларнинг ўз ҳудудига киришига қандай шароитларда рухсат берилишини ҳал қилиши керак. Дарҳақиқат, "мулкдор ўз мулкини ўзи хоҳлаганча тасарруф этиши мумкин бўлганидек, ҳудуд ҳукмдори чет элликларинг давлатга киришига рухсат бериши мумкин бўлган ҳолатлар ва шартларни белгилаб қўйиши бутунлай унинг иродасига боғлиқдир" [4, Б.117].

Шундай қилиб, чет элликларни қабул қилишни рад этиш учун асослар хорижликларнинг сони, дин ва ахлоқ борасидаги фарқлар, уларнинг жиноят борасидаги қарашлари ва жамоат манфаатлари сифатида асосланилиши мумкин бўлган бошқа сабабларга кўра суверен давлатнинг ихтиёрида қолдирилиши керак.

Ўз концепциясининг радикал оқибатларини юмшатиш учун Вольф давлатнинг дискрецийий ваколатини эркин ўтишга бўлган ҳуқуқ билан мувозанатлаштириди. У табиий ҳуқуқ анъаналарига мувофиқ, ҳудудга эгалик қилиш ва суверенитет "зарар етказмасдан фойдаланиш ҳуқуқи"га зиён келтирмаслигини тасдиқлаган.

Бундай ҳуқуқ узрли сабаблар мавжуд бўлганда ерлар ва дарёлар орқали ўтиш ҳуқуқини, миллатнинг мулки ҳисобланган ерларда қолиш ҳуқуқини ва ўз уйларидан чиқариб юборилганларнинг уларга қайтиши ҳуқуқини ўз ичига олади. Вольф заарар етказмасдан фойдаланиш ҳуқуқининг мазмунидан "чет элликларга соғлиғини тиклаш, таълим олиш ёки савдо қилиш мақсадида биз билан қолишига рухсат бериш керак" деган қоидаларни истисно қиласди.

Халқаро ҳуқуқ бўйича бирор бир асар **Эмер де Ваттель** (1714-1767 йй.)нинг "Халқлар ҳуқуқи" асари каби кенг ўрганилмаган ёки иқтибос келтирилмаган. 1758 йилда нашр этилган ушбу асар келгуси асрлар учун мисли кўрилмаган ва мустаҳкам таъсирга эга бўлди.

Ваттельнинг қарашлари судлар ва шарҳловчилар томонидан кўпинча нотўғри талқин қилинган бўлса-да, у эркин ҳаракатланиш тарафдорлари ва давлат суверенитети тарафдорлари ўртасидаги олтин оралиқни ўзида мужассам этади. Бир томондан, швейцариялик олим эмиграция ва иммиграция атамаларини уларни бугунги кун нуқтаи назаридан тушуниш билан солиштирганда бироз одатий шартларда қўллаб-қувватлади ва шакллантириди. Бошқа томондан эса, у хорижликларни қабул қилиш соҳасидаги давлат суверенитетини иккита муҳим шарт билан мувозанатлаштириди ва талқин қилди: тинч мақсадда ўтиш ва зарурат.

Устози Вольфдан фарқли ўлароқ, Ваттель "эмиграция эркинлиги" масаласига узоқ шарҳ берган. У қуйидаги тамойилни эътироф этган: "ҳар бир инсон ўз мамлакатини тарк этиб, бошқа ҳар қандай давлатга кириш ва у ерда жойлашиш ҳуқуқига эга, агар бу билан у ўз мамлакати фаровонлигига хавф туғдирмаса" [6, Б.176]. Мамлакатни тарк этишнинг ушбу чекланган ҳуқуқи мамлакат фуқароларига ҳам чет элликларга ҳам тегишлидир.

Шу билан бирга, эмиграция эркинлиги фақат тинчлик даврида қўлланилади ва жамоат манфаатлари ортга қайтишни талаб қилиши мумкин. Ваттель халқларнинг сиёсий қонунлари бу борада бир-биридан катта фарқ қилишини таъкидлаб, давлат амалиётининг уч турини ажратади:

Баъзи халқларда, ҳар доим, ҳақиқий уруш ҳолатлари бундан мустасно, ҳар бир фуқарога ўзи хоҳлаган вақтда, ҳеч қандай тушунтиришсиз давлатда бўлмаслик ва ҳатто мамлакатни бутунлай тарк этишга рухсат берилиши мумкин. Баъзи бошқа давлатларда ҳар бир фуқарога иш юзасидан хорижга чиқиш эркинлиги берилади, лекин сувереннинг бевосита рухсатисиз ўз мамлакатини бутунлай тарк этишга рухсат берилмайди. Ва ниҳоят, шундай давлатлар борки, ҳукуматнинг қаттиққўллиги ҳеч кимга катта қийинчилик билан расмийлаштириладиган паспортга эга бўлмасдан мамлакатни тарк этишга имкон бермайди.

Юқоридаги ҳолатларнинг ҳаммасида, агар қонуний ҳокимият томонидан чиқарилган бўлса, амалдаги қонунларга риоя қилиш керак. Аммо охирги ҳолатда, суверен ҳукмдор

ўз ҳокимиятини суистеъмол қилмоқда ва ўз фуқароларига саёҳат қилиш учун рухсат бермаган ҳолда уларни чидаб бўлмас қуллик ҳолатига солмоқда, ваҳоланки, у бундай рухсатни давлатга ноқулайлик ва хавф туғдирмаган ҳолда берса бўларди.

Эркин эмиграцияни асосиз чеклашларга қарши ўз нуқтаи назарини қўллаб-куватлаш учун Ваттель “фуқаро ўз мамлакатидан воз кечиш ва уни бутунлай тарк этиш борасида мутлақ ҳуқуққа – ижтимоий шартноманинг табиатидан келиб чиқадиган сабабларга асосланган ҳуқуққа эга” [6, Б.176], деб қатъий таъкидлайди.

Бундай фундаментал ҳуқуқ қўйидаги учта ҳолатда юзага келади: 1) давлат ўз фуқароларини тирикчилик манбаи билан таъминлай олмаса, 2) давлат фуқаролар олдидаги ўз мажбуриятларини бажармаса ёки 3) давлат фуқаролар учун бажарилиши ҳаддан зиёд қийин бўлган қонунларни (масалан, виждан эркинлигини бузувчи) қабул қилса. Гарчи унинг мантиқий асослари биринчи навбатда табиий ҳуқуққа асосланган бўлса-да, Ваттель эмиграция эркинлиги позитив ҳуқуқнинг бир қанча манбаларидан, хусусан, давлат конституцияси, суверен томонидан берилган тўғридан-тўғри рухсатнома ва халқаро шартномалардан келиб чиқиши мумкинлигини қайд этади.

Эмиграция эркинлигидан фарқли ўлароқ, чет элликларни қабул қилиш қабул қилувчи давлатнинг ҳудудий суверенитети кучидан келиб чиқсан ҳолда унинг ваколатига киради. Ваттель ҳам, Вольф сингари, қўйидаги фикрни тасдиқлайди:

Давлат чет элликларнинг ўз ҳудудига киришини ўзи учун фойдали деб ҳисоблаган ҳолда хорижликлар учун бутунлай, ёки алоҳида ҳолларда, ёки маълум шахслар тоифаси учун, ёки муайян аниқ мақсадларда тақиқлаши мумкин. Бу ҳолатларнинг барчаси давлатнинг суверенитети ва ҳудудий устуворлиги ҳуқуқидан келиб чиқади [4, Б.121].

Ваттельнинг фикрига кўра, зарурият ҳуқуқи нуқтаи назаридан хорижликларнинг мамлакатга киришини рад этиш ҳуқуқига нисбатан уларнинг тинч мақсадда ўтишига рухсат бериш мажбурияти устундир. Натижада, зарурият ҳуқуқи чет элликларга давлат томонидан тақиқланган ўтишни бекор қилдиришга мажбурлаш имконини беради. Ваттель буни қўйидагича изоҳлайди:

Хорижликларнинг давлат ҳудудидан ўтиш ҳуқуқи мулоқотнинг ибтидоий қуринишиларидан мерос бўлиб қолган, қачонлардир бутун ер юзи инсоният учун умумий бўлган ва ҳудудлардан ўтиб юриш ҳар бир индивиднинг эҳтиёжларидан келиб чиқиб ҳамма жойда эркин бўлган. Ҳеч ким мазкур ҳуқуқдан бутунлай маҳрум қилиниши мумкин эмас. Аммо, ушбу ҳуқуқдан фойдаланиш эгалик ва мулкнинг жорий этилиши билан чекланган, бу эса бошқаларнинг хусусий мулк ҳуқуқларига етарлича эътибор бермасдан ўтиш ҳуқуқини амалга ошира олмаслигимизга олиб келади. Мулкнинг самараси шундан иборатки, мулкдорнинг устуворликлари бошқа барчанинг устуворликларидан устун бўлиши лозим. Шу сабабли, қачонки ҳудуднинг эгаси сизга унинг ҳудудига кириши рад қилса, сизда ушбу ҳудудга унинг қаршилигига қарамасдан киришучунунинг барча сабабларидан ҳам асослироқ сабаб бўлиши шарт. Зарурият ҳуқуқининг моҳияти шунда: мазкур ҳуқуқ бошқа барча ҳолатларда ноқонуний бўлган, яъни эганинг ҳуқуқларини бузадиган ҳаракатларингизни оқлади [4, Б.124].

Ҳудудий суверенитет ва зарурият ҳуқуқи ўртасидаги бундай мувозанат натижасида Ваттель қўйидагича хulosага келади: “Агар ҳақиқий зарурат сизни бошқа бировнинг ҳудудига киришга мажбур қилса, масалан, муқаррар хавфдан қочиб қутилишнинг бошқа имкони бўлмаса, ёки яшаш учун зарур воситаларга эга бўлиш ёки бошқа зарур мажбуриятларни бажариш учун бошқа йўл йўқ бўлса, - агарда бундай вазиятларда сизга ҳудудга кириш ноҳақ рад этилса, сиз амалдаги тақиқни бузган ҳолда ҳудудга киришингиз мумкин”.

Бундан келиб чиқсан ҳолда, Ваттель томонидан илгари сурилган зарурият ҳуқуқи инсон ҳуқуқларининг жиддий бузилиши хавфи мавжуд бўлганда шахсни чиқариб юбормаслик (**non-refoulement**) борасидаги давлатлар мажбуриятининг ўтмишдоши бўлганлиги юзасидан хulosага келиш мумкин. Бироқ, унинг зарурият ҳуқуқи чет элликларни киришига рухсат бериш тўғрисида қарор қабул қилиш борасидаги давлат ваколати тамойилидан истисно бўлиб қолмоқда.

Шунга кўра, Ваттелнинг концепцияси Витория ва Гроций томонидан ишлаб чиқилган эркин ҳаракатланиш режимидан фарқ қиласди. Шундай қилиб, унинг зарурият хуқуқига асосланган новаторлик қурилмаси биринчи навбатда маҳсус рухсатномасиз чет элликларнинг мамлакатга киришини тақиқлаган Хитой ва Япония каби жуда оз сонли давлатларга нисбатан қўлланилиши лозим эди.

Ваттелнинг қайд этишича, кўплаб бошқа давлатлар амалиётида, масалан, Европа қитъасида, одамларнинг эркин ҳаракатланиши қуйидаги мазмундаги қоида бўлиб қолган: “Европада давлатга душман бўлмаган ҳар бир киши учун барча худудларга кириш эркин, фақат баъзи мамлакатларда дайдилар ва қувфинга учраганлар бундан мустасно бўлиши мумкин”.

Витория, Гроций ва Ваттелнинг қарашлари кўрсатадики, халқаро хуқуққа оид масалаларнинг илк тадқиқотчилари миграция соҳасидаги давлатнинг мутлақ устуворлигини тан олишдан йироқ бўлишган. Аксинча, давлат суверенитети тушунчасининг ўзи зарурият хуқуқига ёки халқлар ўртасидаги мулоқот хуқуқига асосланган чекланган кириш хуқуқига мос келади деб ҳисобланган.

Қанчалик ажабланарли бўлмасин, халқлар хуқуқи доктринаси бузиб талқин қилинган ва иммиграция чекловларини худудий суверенитетнинг табиий натижаси сифатида оқлаш учун ишлатилган. Иммиграция назорати ҳақидаги бу мулоҳаза бугунги кунда одатий ҳолга айланган. Мисол учун, 2004 йилда Буюк Британия Олий суди ўзининг машхур Прага аэропорти иши (*Prague Airport case*)да “чет элликларни қабул қилиш, четлаштириш ва чиқариб юбориш ваколати суверен давлатнинг бирламчи ва энг кенг эътироф этилган ваколатларидан бири эди”, деб таъкидлади.

Бироқ, фикримизча, бундай умум эътироф этилган фикр ҳам тарихий, ҳам норматив сабабларга кўра нотўғри асосларга таянади. Дарҳақиқат, чет элликларни чиқариб юбориш хуқуқи давлатнинг бирламчи мутлақ хуқуқи эканлиги ҳақидаги мулоҳаза нотўғри важуда зиддияти ҳисобланади. Аксинча, чегаралар орқали эркин ҳаракатланиш инсоният тарихида азалдан истисно эмас, балки қоида бўлиб келган. Бундан ташқари, XVI асрдан XVIII аср охиригача миллий давлатчиликнинг ривожланиши ва унинг кўзга кўринмас натижаси бўлган худудий суверенитет чегара назоратининг жорий этилиши билан мувофиқ келмади. Бунинг ўрнига, узоқ вақт давомида чекловлар асосан ҳар бир давлатнинг худуди бўйлаб фуқароларнинг ҳам, фуқаролиги бўлмаган шахсларнинг ҳам ички ҳаракатига нисбатан жорий қилинди (авваламбор, солиққа тортиш мақсадида). Аксинча, хорижликларни қабул қилиш анъанавий равища қабул қилувчи давлатларнинг қудратини мустаҳкамлаш воситаси сифатида қаралган (биринчи навбатда, демографик ва иқтисодий сабабларга кўра). Бундай ёндашув XIX асрнинг катта қисмида XX аср бошларида иммиграция назорати жорий этилгунга қадар ҳукмронлик қилди.

Миграция жараёнларида давлат суверенитети ва эркин ҳаракатланишнинг ўзаро нисбати борасидаги илмий мунозараларда мамлакатимиз олимлари ҳам ўз ёндашувлари билан иштирок этмоқда [9, Б.1087]. Хусусан, Л.Исоқов “ҳозирги кунгача эмиграция инсон хуқуқлари сифатида эътироф этилиши ва иммиграция эса миллий суверенитет масаласи ҳисобланиши ўртасида қарама-қарши фикрлар мавжудлиги” [7, Б.21] юзасидан фикрини илгари сурган бўлса, олимлар Ш.Рахманов ва С.Ишанходжаевлар эса “чет эл фуқаросининг янги жамиятдаги ўрни ва унинг бу ерда муваффақияти қабул қилувчи мамлакат фуқаролари даражасига тенг ёки мутаносиб хуқуқий мақомга эга бўлиш имконияти орқали белгиланади. Ушбу мақомни бериш қабул қилувчи давлатнинг мутлақ ваколатидир” [8, Б.212] деган ёндашувни қўллаб-қувватлайди. Мазкур ёндашув кўпроқ С.Пуфendorf ва К.Вольфларнинг қарашларидан келиб чиқади ва давлат суверенитетининг устуворлиги борасидаги замонавий нуқтаи назарларга ҳамоҳанг ҳисобланади.

Умуман олганда, замонавий миграция жараёнларининг назарий-хуқуқий асослари узоқ ўтмишга бориб тақалади ҳамда мумтоз халқаро хуқуқ намоёндаларининг давлат суверенитети ва эркин ҳаракатланиш борасидаги қарашларидан ўзак олади. Бу борадаги

илемий мунозараларнинг кенг қамровлилигига қарамасдан уларнинг асоси учта асосий мактаб (Витория ва Гроций, Пуфендорф ва Вольф, Ваттель) ғояларига таянади, деган холосага келиш мумкин.

Иқтибослар/Сноски/References:

1. V. Chetail. Sovereignty and Migration in the Doctrine of the Law of Nations: An Intellectual History of Hospitality from Vitoria to Vattel, (2016) 27 (4) EJIL.
2. A. Pagden and J. Lawrence. Francisco de Vitoria: Political Writings (CUP 1992).
3. E. Gordon. Grotius and the Freedom of the Seas in the Seventeenth Century, (2008). Willamette Journal International Law and Dispute Resolution.
4. V. Chetail. International Migration Law. Oxford University Press. 2019.
5. F. Palladini. Pufendorf Disciple of Hobbes: The Nature of Man and the State of Nature: The Doctrine of Socialitas, (2008). History of European Ideas.
6. Emmerich de Vattel. The Law of nations or the principles of natural law in four books. Lonang Institute. 2005.
7. Л.Исоқов. Мигрантлар хуқуқларини таъминлаш ва ҳимоя қилиш: қиёсий-хуқуқий таҳлил. Юридик фанлар доктори (DSc) диссертацияси автореферати. – Т: 2022.
8. Ишанходжаев, С. А., & Рахманов, Ш. Н. (2022). Германияда миграция жараёнини бошқаришнинг ўзига хос жиҳатлари. Oriental renaissance: Innovative, educational, natural and social sciences, 2(6), 210-220.
9. Sulaymanov, O., & Rasulov, J. (2021). Abolition Of Forced Labour: Case Of Uzbekistan. Turkish Journal of Computer and Mathematics Education, 12(4), 1078-1089.